

## 上帝保證祂 ê 應允

「我一定 bē 失我 ê 約，mā bē 改變我所講 ê 話。」

(《全民台語聖經》詩篇 89：34)

Tī 地球上，甚至是 siōng 有權力 ê 人 mā bē tiān-tiān 遵守 in ê 應允。真不幸 ê 是，連美國總統 mā 無例外。用威爾遜 (Woodrow Wilson) 來做例，伊保證伊 bē 去參加戰爭，而且 mā 因為 chit-ê 承諾，hō 伊當選總統。M̄-koh 後來，因為幾項改變，soah 致使威爾遜違反伊 ê 承諾，參加第一次世界大戰。

1960 年，艾森豪 (Dwight D. Eisenhower) 總統對蘇聯 (Soviet) ê 領導者做一個公開聲明，表示咱無 beh 有偵察機飛過蘇俄 (Russia) ê 飛彈基地。總是，過無 gōa 久，咱一台 U-2 間諜飛機 hō 人 phah 落來，飛行員 Hu-lan-si-suh•Ge-lih•Phau-l (Francis Gary Powers) 被掠。蘇聯提供明顯 ê 證據，證明艾森豪 teh 講白賊，hō 咱 ê 國家真無面子。

Tī 越南戰爭期間，政府 ê 高級官員對美國人民講真 chē 白賊。最近，布希 (George H.W. Bush) 總統做一個公開 ê 承諾，講伊 bē 徵收任何新稅。伊大膽講：「讀我 ê 嘴唇：無新 ê 稅收。」M̄-koh，終其尾伊批准新 ê 稅收，所以 mā 喪失連任 ê 機會。

好 koh 誠實 ê 人，有時因為情況 ê 改變，á 是以後 chiah 得 tiòh ê 新資訊，

soah 必須違背 in ê 承諾。

我盡力保持我對美國人民 ê 誓約，tòh 是我 bē 講白賊 á 是做一個會誤導人民 ê 聲明。我 mā 承諾我會盡量維持和平；雖然當我做總統 ê 期間，咱有真 chē 嚴峻 ê 挑戰。總是，咱 lóng 無 tàn 一粒炸彈，á 是發射一粒飛彈，mā 無 tī 戰場 phah 一粒槍籽。雖然 án-ne，我 iáu-koh 是無法度百分之百遵守我 ê 競選承諾。

萬權能 ê 上帝，咱 ê 創造主，祂永遠保持祂 ê 應允。上帝永遠 bē 講白賊，mā 永遠維持祂 ê 掌控。聖經講：「我一定 bē 失我 ê 約，mā bē 改變我所講 ê 話。」講 hiah-ê 話 ê 嘴唇，咱 ē-tàng 相信；永永遠遠相信。

**祈禱：**親愛 ê 上帝 ah，我深深感覺祢有 hō 阮一個保證；我知影祢會永遠遵守祢 ê 話語，永遠 bē 反悔祢對阮所講 ê 話，mā bē bē 記得祢對阮 ê 應允。求祢幫助我成做一個講話有信用 ê 人，hō 其他 ê 人 ē-tàng óa 靠我，因為我是屬 tī 祢 ê。求祢 hō 我成做我身邊 ê 人 ê 祝福。我奉耶穌 ê 名祈禱。阿們。  
(2008.03.23)